

EPOKA

ERE

E përditshme e pavarur
Viti XXIII, nr. 7057
E shtunë, 25 nëntor 2023
Çmimi 0.50

Hyn në fuqi armëpushimi i përkohshëm në luftën në mes të Izraelit dhe Hamasit

FAQE 3



Na ndiqni edhe në:

www.epokaere.com

facebook.com
Gazeta "Epoka e re"

AWR ABBRUCH GMBH
www.awr-abbruch.de

GËRVALLA: DRAFT-STATUTI I ASOCIACIONIT S'ËSHTË SHUMË I MIRË, POR ËSHTË NJË BAZË E MIRË PËR TË PUNUAR ME TË

FAQE 4-5



Ministrja e Punëve të Jashtme, Donika Gërvalla, ka thënë të premtën se draft-statuti i Asociacionit të Komunave me Shumicë Serbe nuk është shumë i mirë në përmbajtje, por një bazë e mirë për të punuar me të. Ajo ka

theksuar se ky draft nuk ofron asnjë lloj autonomie për veriun e Kosovës. "Drafti ka mjaft sfida, respekton shumë prej shqetësimeve tona në të kaluarën dhe mendoj se është një bazë e mirë për të punuar me të. Ju

siguroj se nuk ka asnjë tentativë, asnjë përpjekje, asnjë vullnet dhe as dëshirë të kësaj qeverie, në përgjithësi të institucioneve për të pranuar drafte të cilat janë në dëm të Kosovës", është shprehur Gërvalla

AKTUALE



KURTI: I TAKON BE-SË TA PUBLIKOJË
DRAFT-STATUTIN E ASOCIACIONIT

F. 5

EULEX-I PËRFORCON KAPACITETIN
KËSHILLUES DHE MONITORUES PËR
NË VERI

F. 7

DIPLOMOJNË 45 ZYRTARE
KORREKTUESE

F. 3

EKONOMI

HAPJA E ZYRË NË KOSOVË



UNIONI I BIZNESEVE
SHQIPTARO-GJERMANE
HAP ZYRË NË KOSOVË

F. 8

SHAHINI: NË VITIN 2024 PRITET QË
RRETH 150 MIJË QYTETARË TA
BRAKTISIN KOSOVËN

F. 8

SPORT



BALLKANI, I PAGUESHËM NË
SUPERLIGË

F. 10

**NË MUNGESË TË
TRANSPRENCËS DHE
LLOGARIDHËNIES
BESUESHMËRIA NË
GJYKATËN SPECIALE
ËSHTË NË PIKËPYETJE!**

Reagim i KMDLNj-së

FAQE 9



**DIPLOMATJA
BELGE NË
PRISHTINË:
NORMALIZIMI,
RRUGA E VETME
PËR INTEGRIMIN
E PALËVE NË BE**

FAQE 3



RENOVA
PUTZ
Macedoni
Xhepçisht - Tetovë
Gurëz-Ferizaj
Tel: +389 44 487 300; +389 44 487 009
+389 44 487 755
+389 44 487 200
E-mail: renova@mt.net.mk
Mbx: +377 44 501 289

PRINCESHA
GROUP SH.P.K.
NDËRTIM
PROJEKTIM
SHITJE
INFO: 049-111-101,
044-511-177
www.princesha-ks.com

Bunjamini
FABRIKA E LLAQEVE
MITROVICË
044/256-051
044/367-061
028/532-617
STYROKOL · BUNJAKOL · EUROFASADË

Kolegji BIZNESI
www.kolegji.biznesi.com
info@kolegji.biznesi.com
030 500 878 | 045 500 878
044 500 878 | 049 500 878

SIGMA
VIENNA INSURANCE GROUP
SIGMA INTERBANIAN VIENNA INSURANCE GROUP SH.A
DEGA KOSOVË
Rruga "Pashko Vasa", p.n Prishtinë, Kosovë,
Tel: +381 (0)38 246 301 Fax: +381 (0)38 246 302,
E-mail: info@sigma-ks.net | www.sigma-ks.net

INFINITY
Digital Agency
Endrit Shaqiri
+38344685122
Internet Website,
Marketing...

Ndotja e ajrit ishte "përgjegjëse për më shumë se 250 000 vdekje" në Evropë

SARAJEVË, 24 NËNTOR - Grimcat e ndotura të imta të ajrit kanë shkaktuar vdekjen e më shumë se 250 000 personave në Bashkimin Evropian më 2021, u tha në një raport të Agjencisë Evropiane për Mjedis (EEA), të publikuar më 24 nëntor. Grimcat e imta apo PM2.5 iu referohen grimcave që kryesisht krijohen nga tymi që lirohet nga makinat dhe termocentralet me qymyr. Këto grimca të imta mund të hyjnë thellë në traktin respirator, duke shkaktuar rrezik që

njerëzit të preken nga bronkiti, astma dhe sëmundje të mushkërive. "Sipas vlerësimeve të fundit të EEA-së, të paktën 253 000 vdekje në BE më 2021 u janë atribuuar ekspozimit ndaj grimcave PM2.5, që ishin të ndotura përtej nivelit të rekomanduar nga Organizata Botërore e Shëndetësisë", u tha në raportin e kësaj agjencie të BE-së. Agjencia tha se këto vdekje "ka qenë e mundur që të shmangen... nëse përqendrimet e grimcave të

imta do të ishin në nivelin e rekomandimeve të OBSH-së". Raporti paraqet shifra më të larta të vdekjeve krahasuar me vitin 2020, kur për shkak të ndotjes së ajrit ishte vlerësuar se kishin vdekur 238 000 persona. Sipas Agjencisë Evropiane për Mjedis, rritja e numrit të vdekjeve mund të shpjegohet me rritjen e ekspozimit ndaj ndotësve dhe me rritjen e mortalitetit në Evropë, kryesisht për shkak të pandemisë Covid-19.



Hyn në fuqi armëpushimi i përkohshëm në luftën në mes të Izraelit dhe Hamasit

JERUSALEM, 24 NËNTOR - Një armëpushim i përkohshëm në luftën në mes të Izraelit dhe Hamasit ka hyrë në fuqi të premtën, duke i hapur rrugën shkëmbimit të dhjetëra pengjeve të mbajtur nga luftëtarët e grupit radikal në Gazë, me palestinezë të burgosur në Izrael, raporton Associated Press.

Nuk është raportuar për luftime në orët e para pas fillimit të armëpushimit.

Ndërprerja e luftimeve ka ofruar njëfarë lehtësimi për 2.3 milionë banorët e Gazës, të cilët janë përballur me bombardime të pareshtura izraelite prej javësh, si dhe për familjet në Izrael, të cilat frikohen për fatin e më të dashurve të tyre, të marrë peng gjatë sulmit të 7 tetorit nga Hamasi - i shpallur organizatë terroriste nga Shtetet e Bashkuara të Amerikës dhe Bashkimi Evropian - i cili nxitu luftën.

Armëpushimi ka nisur në orën 7.00, sipas kohës lokale (6:00 sipas kohës në Evropë), dhe pritet të zgjasë të paktën katër ditë.

Gjatë armëpushimit, Hamasi është zotuar se do t'i lirojë të paktën 50 prej rreth 240 pengjeve që i ka marrë gjatë sulmit vdekjeprurës të 7 tetorit në Izrael. Në anën tjetër, Izraeli pritet t'i



lirojë tre të burgosur palestinezë për çdo peng të liruar nga grupi ekstremist palestinez. Hamasi ka thënë se Izraeli do t'i lirojë 150 të burgosur palestinezë. Lirimet pritet të ndodhin në faza, gjatë katër ditëve të ardhshme. Pak pas hyrjes në fuqi të armëpushimit, kamionët me karburante dhe me furnizime të tjera u panë duke hyrë në Gazë nga pika kufitare me Egjiptin, Rafah, teksa marrëveshja lejon një hyrje të shtuar të ndihmave për

civilët që po përballen me mungesë të ushqimit, ujit, ilaçeve dhe energjisë elektrike. Marrëveshja për armëpushim dhe lirim pengjesh e të burgosurish ishte arritur pas javësh negociata të tensionuara indirekte, teksa Katari, ShBA-ja dhe Egjipti shërbyen si ndërmjetës. Armëpushimi shënon ndërprerjen e parë serioze të luftimeve, që kur Izraeli i shpalli luftë Hamasit shtatë javë më parë. Rreth 1 200 njerëz janë vrarë nga

sulmuesit e Hamasit në Izrael, më 7 tetor, sipas autoriteteve izraelite. Izraeli është kundërpërgjigjur me sulme masive ajrore dhe një ofensivë tokësore, duke shkatërruar pjesë të mëdha të Gazës dhe duke vrarë të paktën 13 000 palestinezë, sipas autoriteteve shëndetësore në territorin e qeverisur nga Hamasi. Izraeli ka vazhduar të bombardojë objektiva gjatë natës, para armëpushimit dhe, po ashtu, ka shkatërruar tunele në zonën e

spitalit Shifa, më i madhi i Gazës, ka njoftuar ushtria.

Më parë, këtë javë, Izraeli ka shfaqur një tunel dhe dhoma që, sipas zyrtarëve të saj ushtarakë, përbënin një qendër të madhe e të fshehtë të Hamasit përfundit spitalit. Hamasi dhe stafi i spitalit kanë mohuar pohimet e Izraelit se Shifa përdorej si qendër komanduese e luftëtarëve.

Kryeministri i Izraelit, Benjamin Netanyahu, është zotuar se do ta vazhdojë luftën kundër grupit radikal palestinez, pasi armëpushimi të skadojë, për t'i shkatërruar kapacitetet ushtarake të Hamasit, për t'i dhënë fund qeverisjes së tij 16-vjeçare në Gazë dhe për t'i kthyer të gjitha pengjet që po mbahen në Gazë. "Ne do të vazhdojmë derisa t'i arrijmë të gjitha objektivat tona", ka thënë Netanyahu, duke shtuar se ia ka përcjellë të njëjten porosi presidentit amerikan, Joe Biden, gjatë një bisede telefonike. Uashingtoni i ka ofruar Izraelit mbështetje të gjerë ushtarake dhe diplomatike që nga fillimi i luftës. Ministri i Mbrojtjes i Izraelit, Yoav Gallant, është cituar t'u ketë thënë trupave të enjten se pushimi i tyre do të jetë i shkurtër, dhe se lufta do të vazhdojë me intensitet edhe të paktën dy muaj të tjerë.

Shkencëtarët në Brazil identifikojnë një specie të re të dinozaurëve

BRAZILIA, 24 NËNTOR - Shërbimi gjeologjik në Brazil tha më 23 nëntor se ka zbuluar një specie të re të dinozaurëve, një kafshë të shpejtë që kishte jetuar në shkretëtirë gjatë periudhës së hershme të Kretakut. Specia e re, e quajtur Farlowichnus rapides, ishte një kafshë e vogël mishngrënëse e gjatë 60-90 centimetra, sipas hulumtuesve. Zbulimi u publikua në revistën shkencore "Cretaceous Research". "Nga një distancë

e madhe në mes të gjurmëve të këmbëve që kemi gjetur, është e mundur të konkludohet se ai ishte një zvarranik shumë i shpejtë që vraponte nëpër shkretëtirë", tha Shërbimi Gjeologjik përmes një deklaratë. Periudha e hershme e Kretakut daton nga 100 deri në 145 milionë vjet më parë. Fosilet e dinozaurëve në Brazil fillimisht u gjetën në vitet '80 nga prifti dhe paleontologu italian Giuseppe Leonardi në qytetin Ararakuara në shtetin

e Sao Paolos. Leonardi duroi një nga mostrat e gjurmëve që u gjetën në formacionin e quajtur Botukatu, që është një grup shkëmbinjsh që është formuar nga shkretëtira e lashtë për Muzeun e Shkencave të Tokës më 1984. Gjurmët që janë gjetur në Brazil dallojnë nga gjurmët e gjetura të dinozaurëve në pjesë të tjera të botës, ka thënë paleontologu i Muzeut të Shkencave të Tokës në Brazil, Rafael Costa.



Diplomatja belge në Prishtinë: Normalizimi, rruga e vetme për integrimin e palëve në BE

PRISHTINË, 24 NËNTOR - Ministrja e Punëve të Jashtme e Belgjikës, Hadja Lahbib, në një konferencë të përbashkët për medie në Prishtinë me kryediplomatën e Kosovës, Donika Gërvalla, ka thënë se normalizimi i marrëdhënieve në mes të Kosovës dhe Serbisë është mundësia e vetme për integrim evropian të të dyja vendeve. “Kemi biseduar për dialogun në mes të Prishtinës dhe Beogradit. Janë bërë hapa domethënës për normalizimin e raporteve dhe është shumë e rëndësishme të mos ketë tensione. Normalizimi është rruga e vetme për marrëveshje dhe për integrimin e të dyja palëve në Bashkimin Evropian”, ka deklaruar Lahbib pas takimit me Gërvallën. Ajo ka thënë se në këto kohë sfiduese është “në interesin tonë parësor që të qëndrojmë sa më afër që të jetë e mundur, kështu siç jemi tani”. Jashtë kësaj, kryediplomatja belge tha të jetë e “kënaqur” për lidhjet e forta në mes të dy vendeve, pra Kosovës dhe

Belgjikës. “Belgjika ishte një nga vendet e para që ka njohur pavarësinë e Kosovës në vitin 2008 dhe kemi punuar në shumë çështje të ndryshme”, potencoi ajo, teksa përmendi edhe diasporën e Kosovës atje, për të cilën tha se “janë bërë pjesë e shoqërisë belge duke e pasuruar edhe më tej”, tha Lahbib.

Nga ana tjetër, Gërvalla, në këtë konferencë tha ta ketë falënderuar homologen e saj belge “për përkushtimin e Mbretërisë së Belgjikës për t’i ndihmuar Kosovës gjatë gjithë rrugës së shtetndërtimit të saj dhe, gjithashtu, për partneritetin e sinqertë dhe partneritetin e fortë që i lidh dy vendet tona”. “Jemi këtu për të bërë një hap më tej për t’i thelluar marrëdhëniet tona”, ka thënë Gërvalla, derisa ka treguar edhe për temat që kanë biseduar me Lahbib. “E informova rreth progresit që Kosova ka bërë në fushën e sundimit të ligjit, në fushën e zhvillimit ekonomik, në fushën e reformave institucionale dhe



reformat në përgjithësi në vendin tonë”, ka thënë Gërvalla.

Përveç këtyre, Gërvalla tha se subjekt diskutimi kanë qenë edhe sfidat e sigurisë, “ato

gjeopolitike dhe ato të rajonit tonë”, “Jo vetëm të Kosova po përballet me sfida të shumta për shkak të sjelljes tejet agresive të fqinjit të saj (Serbisë), por edhe Evropa në

përgjithësi, e gjithë botë perëndimore, përballet me rreziqe të cilat vetëm të bashkuar mund t’i përballojmë”, ka pohuar ministrja Gërvalla.

Diplomojnë 45 zyrtare korrektuese

EPOKA ERE

Faton DËRMAKU

PRISHTINË, 24 NËNTOR - “Shënimi i përvjetorëve të institucioneve ka rëndësinë e veçantë, kur progresi i tyre është evident, kur efikasiteti i shërbimeve është drejt lartësisë së dëshirueshme, kur ne mburremi me këto suksese, dhe inkurajohemi për më shumë punë në të ardhmen që na pret”, u shpreh kryeministri i Kosovës, Albin Kurti, në ceremoninë e 24-vjetorit të Themelimit të Shërbimit Korrektues të Kosovës si dhe diplomimit të gjeneratës së 43-të të zyrtarëve korrektues. Në fjalën e tij, kryeministri Kurti tha se Shërbimi Korrektues është institucion i cili duhet ta garantojë sigurinë e secilit të dënuar, dhe mundësinë e korrektimit të individëve të cilët në të kaluarën kanë bërë veprime të gabuara apo të tilla të cilat sanksionohen me ligjet e Republikës së Kosovës. Në këtë ceremoni, para shumë të pranishmëve, kryeministri shtoi se në qeverisjen tonë kemi miratuar Reformën Ligjore në Shërbimin Korrektues të Kosovës, e cila avancoi shërbimet ndaj të burgosurve dhe të drejtat e tyre. Po ashtu, kemi shtuar kapacitetet dhe mundësitë për ngritje profesionale përmes trajnimeve adekuata për personelin. Teksa foli edhe për Ligjin për



Ekzekutimin e Sanksioneve Penale, ai tha se është paraparë reforma lidhur me trajtimin e personave të privuar nga liria, të drejtat dhe përfitimet që do t’u takojnë, sikurse ditët e pushimit jashtë Institucionit Korrektues

(14 ditë brenda vitit), kalimin e kohës në hapësira të veçanta për të gjithë të dënuarit, lirinë e parakohshëm në 3, 6, apo 9 muaj, varësisht nga vlerësimi dhe përmbushja e kriterëve që arrin i dënuari.

Ndërkaq përmes Ligjit për Shërbimin Korrektues të Kosovës, kryeministri Kurti theksoi se është rregulluar statusi, parimet, përgjegjësitë, menaxhimi dhe organizimi i përgjithshëm i Shërbimit

Korrektues, kushtet e veçanta apo shtesë për rekrutim e shumëçka tjetër. “Po ashtu, me këtë ligj është paraparë themelimi i disa njësive të reja të nevojshme për veprimtarinë e ShKK-së. Përgjatë dy viteve të fundit, me përkrahjen e Ambasadës Amerikane, janë trajnuar dhe certifikuar 104 zyrtarë në fusha të ndryshme dhe, po ashtu, me qëllim të ngritjes së kuotës gjinore në radhët e stafit korrektues, sot me sukses po certifikon edhe 45 zyrtare korrektuese gra, si gjeneratë e 43 e ShKK-së. 70 kandidatë për zyrtarë korrektues janë në proces të rekrutimit të cilët do t’i ndjekin trajnimet për avancim dhe zhvillim në fusha profesionale. Në proces është edhe themelimi i Institucionit për Trajnimin dhe Trajtimin e Personave me Nevoja të Veçanta”, ka thënë Kurti. Synimi ynë, tha më tej kryeministri, është që të gjithë të burgosurit, të gjithë ata që vuajnë dënimin, një ditë kur ta kenë përfunduar atë të integrohen në shoqëri më të mirë, më të drejtë, më të aftë sesa që ishin më herët. Në përmbyllje të fjalës së tij, kryeministri Kurti veçoi se përgatitjet nuk do të mungojnë, profesionalizimi vetëm sa do të shtohet, kujdesi dhe siguria do të jenë prioritet, dhe trajtimi dinjitoz i të gjithëve pa dallim do të jetë i përhershëm.



Gërvalla: Draft-statuti i Asociacionit s'është shumë i mirë, por është një bazë e mirë për të punuar me të

Ministrja e Punëve të Jashtme, Donika Gërvalla, ka thënë të premten se draft-statuti i Asociacionit të Komunave me Shumicë Serbe nuk është shumë i mirë në përmbajtje, por një bazë e mirë për të punuar me të. Ajo ka theksuar se ky draft nuk ofron asnjë lloj autonomie për veriun e Kosovës. "Drafti ka mjaft sfida, respekton shumë prej shqetësimeve tona në të kaluarën dhe mendoj se është një bazë e mirë për të punuar me të. Ju siguroj se nuk ka asnjë tentativë, asnjë përpjekje, asnjë vullnet dhe as dëshirë të kësaj qeverie, në përgjithësi të institucioneve për të pranuar drafte të cilat janë në dëme të Kosovës", është shprehur Gërvalla.

EPOKA E RE

Mal QORRAJ

PRISHINË, 24 NËNTOR - Draft-statuti i Asociacionit të Komunave me Shumicë Serbe, i pranuar në parim nga Qeveria e Kosovës javë më parë, sipas ministres së Punëve të Jashtme, Donika Gërvalla, nuk është shumë i mirë në përmbajtje, por një bazë e mirë për të punuar me të. Në një prononcim përpara gazetarëve, kryediplomatja ka theksuar se draft-statuti i Asociacionit, i cili ka ende statusin konfidencial dhe publiku nuk mund ta shohë edhe për një kohë, "respekton shumë prej shqetësimeve tona". "Drafti nuk ofron asnjë lloj autonomie për veriun e Kosovës dhe nuk është fer pyetja sepse përgjigjja nuk varet nga ne. Po të ishte për ne si Qeveri e Republikës së Kosovës menjëherë të nesërmen do ta kishim publikuar. Është kërkesë e atyre që merren me procesin e negociatave.

Prandaj drafti është jo shumë i mirë. Drafti ka mjaft sfida, respekton shumë prej shqetësimeve tona në të kaluarën dhe mendoj se është një bazë e mirë për të punuar me të. Unë ju lus që të keni pak durim lidhur me çështjen e draftit. Ju siguroj se nuk ka asnjë tentativë, asnjë përpjekje, asnjë vullnet dhe as dëshirë të kësaj qeverie, në përgjithësi të institucioneve për të pranuar drafte të cilat janë në dëm të Kosovës. Kemi marrë vlerësimin qytetar me premtime të mëdha dhe ato premtime nuk kemi për t'i shkelur në asnjë aspekt", ka thënë ministrja Gërvalla.

Gërvalla paraqet projektbuxhetin e MPJD-së për vitin 2024

Ministrja Gërvalla të premten ishte e ftuar në mbledhjen e Komisionit për Punë të Jashtme dhe Diasporë,

ku u shqyrtua Projektligji mbi ndarjet buxhetore për Buxhetin e Republikës së Kosovës për vitin 2024 lidhur me fushën në fushëveprim të këtij komisioni. Fillimisht, kryetarja e komisionit, Arbëreshë Hyseni-Kryeziu, përmendi investimet e qeverisë për blerjen e objekteve për misionet diplomatike të Kosovës. Më pas ajo kërkoi sqarime nga ministrja Gërvalla, lidhur me blerjen e objektit për nevoja diplomatike në Strasburg, duke kërkuar tutje të dhëna më të hollësishme rreth planit për këtë çështje meqë, shtoi ajo, është fokus i veçantë i MPJD-së ndarja e mjeteve për objektet diplomatike. Ministrja Gërvalla gjatë prezantimit të saj paraqiti projektbuxhetin e MPJD-së për vitin 2024 si dhe përmbledhi të arriturat dhe sfidat e kësaj ministrie përgjatë këtij viti. Duke u fokusuar tutje në buxhetin e ndarë për këtë ministri për vitin 2024, me theks të veçantë ajo foli

lidhur me blerjen e objekteve për misionet diplomatike të Kosovës. Po ashtu, ministrja Gërvalla paralajmëroi se shumë shpejt do të përfundojë edhe blerja e ndërtesës për Ambasadën e Kosovës në Kroaci, duke vënë në pah optimizmin e saj edhe për blerjen e objektit në Strasburg, si dhe fokusimin e ministrisë te vendet e Quintit.

Pas prezantimit të ministres Gërvalla, anëtarët e komisionit ngritën një sërë çështjesh të cilat ndërlidhen me punën dhe buxhetin e kësaj ministrie. Anëtarja e komisionit, Fitore Pacolli, përveç blerjes së objekteve për ambasadë, kërkoi të dhëna edhe rreth objektivave të kësaj ministrie si dhe për shtim të stafit. Anëtarja tjetër e këtij komisioni, Yllëza Hoti, pyeti ministren Gërvalla rreth subvencionimit dhe përfshirjes së të rinjve nga diaspora në projektet e ardhshme. Më tutje, Gazmend Gjyshinca, anëtar i këtij komisioni, kërkoi më shumë informata nga ministrja Gërvalla, lidhur me zgjerimin e misioneve të reja diplomatike të Republikës së Kosovës. Ndërkaq anëtarja e komisionit, Ariana Musliu-Shoshi, shfaqti një varg kritikash për ministren Gërvalla, lidhur me raportimin e saj në këtë komision, si dhe për blerjen e objekteve për ambasadë. Po ashtu, ajo kërkoi të dhëna nga

Gërvalla rreth këshilltarëve të saj dhe për të ardhurat e diplomatëve. Pas shterimit të diskutimit, anëtarët e komisionit me shumicë votash përkrahën projektbuxhetin e MPJD-së për vitin 2024.

Paga 7 500 euro për Gani Jakupin, Gërvalla: Shumë modeste për një personalitet të rëndësishëm kulturor

Paga prej 7 500 eurosh që Ministria e Punëve të Jashtme ia jep në muaj artistit Gani Jakupi është një shumë modeste, ka thënë ministrja Donika Gërvalla, kur ka raportuar në komisionin parlamentar për punë të jashtme. "Nuk është pagë mujore, është shuma e cila përfshin shpenzimet e një projekti të tërë njëvjeçar dhe e cila është një shumë modeste krahasuar me shumën që janë paguar për lobim në Afrikë dhe në shtetet e tjera", shpjegoi ajo. Ajo është shprehur krenare që dikasteri të cilën ajo e drejton me një shumë kaq modeste ka angazhuar një personalitet të shquar kulturor. "Po e përsëris, kjo nuk është pagë. Është një shumë e një projekt lidhur me objektiva të qarta të përcaktuara saktë, i cili i shërben Republikës së Kosovës dhe vendosjes së saj nëpër vende jonjohëse kryesisht", potencoi ajo.

KE-ja do t'i përgjigjet qeverisë për heqjen e vizave për shtetasit e Kosovës me pasaporta të Serbisë

PRISHTINË, 24 NËNTOR - Komisioni Evropian nuk u ka dhënë përgjigje pyetjeve specifike rreth propozimit që edhe bartësit e pasaportave të Serbisë që jetojnë në Kosovë të përfshihen në liberalizimin e vizave.

Në prill të këtij viti KE-ja kishte theksuar se liberalizimi i vizave i miratuar për Kosovën vlen vetëm për poseduesit e pasaportave të Kosovës dhe jo për ata qytetarë që kanë pasaporta të Administratës Koordinuese, e cila punon në kuadër të Ministrisë së Punëve të Brendshme të Serbisë. Por, në propozimin e ri, KE-ja ka argumentuar se tashmë nuk ekzistojnë arsye për shkak të të cilave ishte vendosur që bartësit e pasaportave të Republikës së Serbisë me vendbanim në Kosovë të mos kenë mundësi të udhëtojnë pa viza, për dallim nga shtetasit e Serbisë me vendbanim në Serbi.

Zëdhënësja e Komisionit Evropian për çështje të brendshme, Anitta Hipper, ka paralajmëruar se komisionarja për Punë të Brendshme, Ylva



Johanson, do të mund të përgjigjet në letrën dërguar nga ana e Qeverisë së Kosovës. "Komisioni Evropian më 16 nëntor ka miratuar propozimin me qëllimin për ta siguruar përfshirjen e të gjithë qytetarëve të Ballkanit Perëndimor në mundësinë e udhëtimit pa viza në BE. Komisioni është në pritje që kjo të miratohet nga ligjvënësit në BE", i është përgjigjur ajo pyetjes se cili është qëndrimi i Komisionit rreth vërejtjeve që ka

dhënë Qeveria e Kosovës dhe disa organizata joqeveritare nga Kosova, se me këtë propozim Komisioni do ta pengojë integrimin e serbëve në Kosovë dhe se një e gjë e tillë shkel integritetin territorial të Kosovës. "Sa i përket çështjes së dytë, ajo do të përcillet nga komisionarja Johanson në përgjigjen e saj për pyetjen specifike", ka thënë zëdhënësja e Komisionit Evropian duke iu referuar letrës që Qeveria e Kosovës i ka dërguar

Komisionit Evropian. Zëvendëskryeministri i Kosovës, Besnik Bislimi, më 20 nëntor i ka dërguar një letër Komisionit Evropian dhe Këshillit të BE-së ku thotë se ky propozim shkel sovranitetin e Kosovës, pengon integrimin e serbëve në Kosovë dhe hap rrezikun e përdorimit të të dhënave të pasakta çka paraqet edhe kërcënim të sigurisë. "Lëshimi i pasaportave nga Qendra Ilegale Koordinuese e Serbisë, që i konsideron komunat në Kosovë si pjesë e juridiksionit të Serbisë, është shkelje serioze e sovranitetit", thuhet në letrën e Qeverisë së Kosovës, ku rikujtohet se Bashkimi Evropian e ka konsideruar Kosovën si të vetmin autoritet legjitim për regjistrin civil me të drejtë të lëshimit të pasaportave për qytetarët që jetojnë në hapësirën e saj. Qeveria e Kosovës ka hedhur poshtë pohimet se serbët nuk do të përfshiheshin në liberalizimin e vizave pasi ata, me procedurë të përshtetshme dhe të thjeshtëzuar, mund të pajisen me pasaporta të Kosovës.

Në letrën e Qeverisë së Kosovës jepen edhe shifrat, sipas të cilave, vetëm në dhjetë muajt e parë të këtij viti 4 350 serbë të Kosovës kanë marrë pasaporta të Kosovës, që është rritje prej 29-përqindësh krahasuar me vitin e kaluar.

Lidhur me propozimin e KE-së kanë reaguar më herët gjatë 21 nëntorit edhe mbi 20 organizata të shoqërisë civile.

Përmes një letre të hapur drejtuar Ylva Johansson, komisionares evropiane për Çështje të Brendshme, shoqëria civile ka kërkuar që KE-ja ta tërheqë propozimin.

Nga 1 janar i vitit 2024 qytetarët e Kosovës pritet të udhëtojnë pa viza në 27 vende të BE-së, të cilat e përbëjnë të ashtuquajturën Zonë Shengen.

Pasi të hyjë në fuqi liberalizimi i vizave për bartësit e pasaportave biometrike të Republikës së Kosovës, bartësit e pasaportave të Serbisë me vendbanim në Kosovë, nëse propozimi i KE-së nuk jetësohet, do të mbeteshin të vetmit pa mundësinë e lëvizjes pa viza.

Kurti: I takon BE-së ta publikojë draft-statutin e Asociacionit

PRISHTINË, 24 NËNTOR - Kryeministri i Kosovës, Albin Kurti, ka thënë se nuk është ai i cili duhet ta publikojë draft-statutin e Asociacionit të Komunave me Shumicë Serbe. Këtë, sipas tij, duhet të bëjë ndërmjetësi evropian. Propozimi i zyrtarëve perëndimorë për formim të Asociacionit të Komunave me Shumicë Serbe në Kosovë u është paraqitur Kurtit dhe presidentit serb Aleksandër Vuçiq më 21 tetor nga përfaqësuesit e Shteteve të Bashkuara (ShBA), Bashkimit Evropian (BE), Francës, Gjermanisë dhe Italisë. "Tash i përket ndërmjetësit [BE-së], i përket ndërmjetësit evropian që ta bëjë publik draftin dhe kjo është arsyeja pse unë nuk i bëj dot publike vërejtjet dhe kritikën e mia. Besoni që ka aktorë të ndryshëm që mezi presin unë të bëj shkelje të procesit dhe procedurave dhe kjo do ta dëmtojë përfaqësimin e Republikës së Kosovës. Sa për mua le ta publikojnë edhe draft-statutin, e kësajori të hapet edhe rruga për të publikuar edhe ne vërejtjet e kritikën tonë", tha Kurti para gazetarëve të premten në Prishtinë.

Kurti përsëriti se më 26 tetor, në takim në Bruksel me liderët

evropianë, ka shprehur gatishmërinë për ta nënshkruar "paketën, jo njërin prej teksteve" që, sipas tij, nënkupton së pari Marrëveshje Bazike, Aneksin e zbatimit dhe pastaj draft-statutin. Ndërkaq, në fillim të këtij viti arritën marrëveshjen drejt normalizimit dhe aneksin për zbatimin e tij. Marrëveshja, prej 11 nenes, mes të tjerash, parashihet edhe një nivel të vetëmenaxhimit për komunitetin serb në Kosovë dhe njohje të ndërsjellë të simboleve shtetërore, ndërsa kërkon nga Prishtina dhe Beogradi t'i zbatojnë, po ashtu, të gjitha marrëveshjet e mëhershme të dialogut.

Sipas Kurtit, duke refuzuar nënshkrimin, Serbia nuk dëshiron asociacion për serbët e Kosovës, por "kundër Kosovës". "U lëshua një shans unik e i jashtëzakonshëm që të vulolet normalizimi. Me këtë rast, më lejoni të theksoj që nëse Serbia do të ishte e interesuar për normalizim, përveç që nuk do ta shkelte Marrëveshjen Bazike të 27 shkurtit, njëkohësisht ajo do të bënte hapa të përparimit sa i përket kapitullit 35 të negociatave për anëtarësim në Bashkim Evropian", tha Kurti.



Jakupi, sipas Gërvallës, është angazhuar në kuadër të diplomacisë kulturore dhe në kuadër të projekteve të Ministrisë së Punëve të Jashtme për të krijuar, siç tha ajo, "një ambient tjetër në vendet jonjohëse". "Si ministre shfrytëzoj të gjitha instrumentet

natyrisht duke kursyer buxhetin e shtetit, sepse lehtë është të angazhosh një kompani që kushton 4 milionë euro, por vështirë është të gesh personalitete të rëndësishme kulturore dhe publike".

Gërvalla ka tentuar të amortizojë

këtë shumë duke thënë se qeveritë e mëparshme kanë paguar edhe 50-fish më shtrenjtë për shërbime të njëjta. "Sa i përket pagës prej 7 500 eurosh, pikërisht partia që ju përfaqësoni ka paguar 50-fishin. Me PDK-në hezitohet të diskutojë për financa. Unë ju dëgjova sepse ju e

shfrytëzoni mikrofonin vetëm për të bërë gënjeshtër. Kjo nuk është pagë. Është një projekt i lidhur me objektiva të qarta", ka theksuar ajo. Mediumi "Periskopi" ditë më parë kishte raportuar se 7 500 euro është paga me të cilën Gani Jakupi paguhet nga Qeveria e Kosovës për

pozitën këshilltar në Ministrinë e Punëve të Jashtme.

"Periskopi" raportoi se Jakupi jeton në Spanjë, por është angazhuar nga ambasadori i Kosovës në Bruksel, Agron Bajrami, si këshilltar i jashtëm për çështje kulturore dhe mediatike.

Komuna e Rahovecit lanson hartën e lirisë

RAHOVEC, 24 NËNTOR - Në kuadër të platformës elektronike "Rahoveci digjital", në prag të festave të nëntorit është lansuar edhe një projekt shumë i rëndësishëm "Harta e lirisë". Në këtë hartë janë paraqitur lapidarët e dëshmorëve, varrezat e

dëshmorëve, varrezat e martirëve, pikat e zjarrit të UÇK-së, barrikadat, ambulancat, muzetë, shtëpitë që kanë shërbyer si shtabe të UÇK-së, shtëpitë që kanë shërbyer si baza të organizimit, strehë dhe logjistikë të UÇK-së. Komuna e Rahovecit ka

njoftuar se harta është realizuar me programe bashkëkohore digjitale dhe hartografike, në bashkëpunim mes OVL - Dega në Rahovec, Idriz Shala - ekspert i hartografisë, zyrtarët e komunës nga zyra e IT -së dhe kompania "Rama Print".



Lulzim Tafa dekorohet nga presidenti francez Emmanuel Macron

PRISHTINË, 24 NËNTOR - Rektori i Kolegjit AAB, Lulzim Tafa, njëherësh një ndër poetët kosovarë më të njohur në botë, është dekoruar nga shteti francez si "Oficer i Urdhrit Kombëtar të Letrave dhe Arteve".

Kjo dekoratë është më e larta në fushën e artit dhe letërsisë nga Franca, ndërsa është edhe dekorata më e lartë të cilën e ka marrë deri tani ndonjë shkrimtar nga Kosova.

"Urdhri Kombëtar të Letrave dhe Arteve" e jep Ministria e Kulturës e Francës që nga viti 1957 dhe është nën përkujdesjen e presidentit të Republikës së Francës.

Tafa është një nga poetët më të njohur kosovarë në botë. Veprat e tij janë përkthyer në rreth tridhjetë gjuhë të botës, ndërsa është vlerësuar nga kritika letrare botërore si një nga poetët kryesorë postmodernistë të Evropës.

Kohën e fundit Lulzim Tafa është bërë i njohur edhe për artin e tij në shërbim të paqes, në veçanti para shpërthimit të luftës në Ukrainë

me poezinë "Fol me poetët rusë" si dhe me letrat dërguar shumë artistëve dhe shkrimtarëve rusë me lutjet që të ndikojnë te politika që ta parandalojnë luftën.

Si rezultat i përpjekjeve të tij kundër luftës me anë të poezisë ai është nderuar nga shumë institucione kulturore dhe arsimore edhe në Ukrainë, ku është dekoruar edhe nga Patriarku i Ukrainës, Patriarku Filaret, me urdhrin "Yuri i Shenjtë Fitimtar".

Lulzim Tafa, po ashtu, ka fituar shumë çmime prestigjioze ndërkombëtare, mban shumë tituj nderi në akademi dhe universitete ndërkombëtare.

Ndër të tjera, është anëtar i Akademisë së Shkencave dhe Arteve të Evropës si dhe anëtar i Akademisë së Shkencave, Arteve dhe Letërsisë në Paris.

Ceremonia e dekorimit të poetit Lulzim Tafa me urdhrin "Oficer i Letrave dhe Arteve" do të bëhet me ceremoni zyrtare në Rezidencën Franceze në Prishtinë.



Ambasadori hungarez viziton komunën e Prizrenit, me Totajn bisedojnë për turizmin

PRIZREN, 24 NËNTOR - Kryetari i komunës së Prizrenit, Shaqir Totaj, ka pritur të premten në takim ambasadorin e Hungarisë në Kosovë, Bela Bozsik, me bashkëpunëtorë, me të cilin kanë diskutuar për shumë tema me interes të dyanshëm. Gjatë kësaj vizite, e para të një kryetar komune si ambasador, Bozsik shfaqti mbështetjen e tij për procesin e integritetit evropian të Kosovës.

Zhvillimi i biznesit dhe i turizmit mes dy vendeve ishte ndër çështjet kryesore që u biseduan. Gjithashtu, ambasadori Bozsik njoftoi se qeveria hungareze ndan 75 bursa për vitin 2024, për studime bachelor dhe master për studentët e Kosovës, me ç'rast shfrytëzoi rastin t'u bëjë thirrje studentëve prizrenas për aplikim dhe vazhdim të studimeve në Hungari.

Bulliqi pret në takim menaxherin regional të Postës, diskutojnë për shërbimet postare që ofrohen në Podujevë

PODUJEVË, 24 NËNTOR - Kryetari i komunës së Podujevës, Shpejtim Bulliqi, ka zhvilluar takim me menaxherin regional të Postës së Kosovës, Flamur Kadriu, zyrtarin financiar Altin Hoxha dhe menaxherin e Postës në Podujevë, Shemsie Vokri.

Gjatë këtij takimi është diskutuar lidhur me shërbimet postare që ofrohen në komunën e Podujevës si dhe është diskutuar për nevojën e avancimit të këtyre shërbimeve duke bërë digjitalizimin e shërbimeve dhe përmirësimin e

shërbimeve postare. Kryetari Bulliqi shprehu gatishmërinë për bashkëpunim si institucion komune me qëllim të lehtësimit të punës së Postës së Kosovës në terren me qëllim të ofrimit sa më cilësor të shërbimeve të këtij institucioni.



Krasniqi: Më shumë se 650 mijë qytetarëve u është rritur norma e interesit të kredive vitin e fundit

PRISHTINË, 24 NËNTOR - Kryetari i Partisë Demokratike të Kosovës (PDK), Memli Krasniqi, ka publikuar të premten shifrat e fundit që ka publikuar Komisioni Evropian në raportin për Kosovën sa iu përket kredive të qytetarëve dhe goditjen e tyre nga rritja

e normave të interesit. Sipas raportit të Komisionit Evropian, normat e interesit të kredive gjatë vitit 2022 janë rritur në 6.3 për qind derisa një vit më parë ishin më të ulëta.

Krahas ngritjes së çmimeve, edhe kjo rritje e normave të interesit të kredive ka prekur

më shumë se 650 mijë qytetarë të Kosovës. "Mbi 650 mijë qytetarë të Kosovës, të cilët kanë kredi, krahas rritjes së çmimeve, duhet të përballojnë edhe rritjen e normave të interesit të kredive! #Regres", ka shkruar Krasniqi në "Facebook".



EULEX-i përforcon kapacitetin e tij këshillues dhe monitorues për në veri

EPOKA
ERE

Faton DËRMAKU

PRISHTINË, 24 NËNTOR - Një Ekip i Specializuar (ES) prej gjashtë këshilltarësh policorë u dislokua në Kosovë për ta përforcuar kapacitetin këshillues dhe monitorues të Misionit të Bashkimit Evropian për Sundimin e Ligjit në Kosovë (EULEX), në përputhje me mandatin e EULEX-it për t'i mbështetur institucionet e përzgjedhura të sundimit të ligjit në Kosovë, në rrugën e tyre drejt rritjes së efektivitetit, qëndrueshmërisë, shumetnicitetit dhe llogaridhënies, pa ndërhyrje politike dhe në përputhje me standardet ndërkombëtare të drejtave të njeriut dhe praktikat më të mira evropiane. Në mënyrë të veçantë, ES e

EULEX-it do ta këshillojë Policinë e Kosovës se si t'i kryejë më mirë aktivitetet e rregullta policore gjatë parandalimit dhe luftimit të krimit dhe ofrimit të sigurisë, duke e monitoruar gjithashtu respektimin e detyrimeve të tyre për të drejtat e njeriut, për t'u shërbyer komuniteteve që ata i mbrojnë dhe për ta rritur besimin e popullatës përmes punës policore të orientuar në komunitet.

Dislokimi i ES të EULEX-it do të zgjasë fillimisht për dy muaj, me mundësinë e vazhdimit derisa misioni ta ketë krijuar një kapacitet afatgjatë këshillues policor në veri të Kosovës.

Pjesëtarët e ES të EULEX-it janë të dërguar nga Holanda (tre) dhe Suedia (tre) dhe, duke u bazuar në përvojën dhe ekspertizën e

tyre policore në komunitet, do të punojnë në komunat veriore në koordinim të ngushtë me kolegët e tyre të Policisë së Kosovës dhe me Këshilltarët e Lartë Policorë të EULEX-it, të cilët e këshillojnë Drejtorinë Rajonale të Policisë në Mitrovicën e Veriut dhe katër stacionet policore nën komandën e saj.

Dislokimi i Ekipeve të Specializuara me ekspertizë dhe kapacitete të ndryshme është një instrument i ofruar nga Kompakti i Politikës Civile të Përbashkët për Siguri dhe Mbrojtje (CSDP), i miratuar në maj 2023 për të dislokuar shpejt ekspertë në Misionet Civile të CSDP-së për t'iu përgjigjur me shpejtësi nevojave operacionale dhe zhvillimeve të sigurisë në terren.

Kushtetuesja e rrëzon në tërësi Ligjin për masat e përkohshme të produkteve themelore

PRISHTINË, 24 NËNTOR - Gjykata Kushtetuese ka rrëzuar Ligjin për masat e përkohshme të produkteve themelore në raste të veçanta të destabilizimit në treg, të cilin LDK-ja e kishte dërguar në kushtetuese për shqyrtim.

Në njoftimin e Kushtetueses është thënë se ligji në fjalë duhet të shpallet i pavlefshëm në tërësinë e tij. "Në fund, aktgjykimi sqaron që kërkesa e parashtruesve të kërkesës është parashtruar në gjykatë bazuar në paragrafin 5 të nenit 113 (Juridiksioni dhe Palët e Autorizuara) të Kushtetutës dhe se kjo kategori e kërkesave ka karakter suspenziv, përkatësisht ligji i tillë mund t'i dërgohet presidentit të Republikës së

Kosovës për shpallje vetëm pas vendimmarrjes së gjykatës dhe në pajtim me modalitetet e përcaktuara në vendimin final të gjykatës për rastin e kontestuar. Në kontekst të praktikës së saj gjyqësore, siç është shtjelluar edhe në aktgjykim, gjykata vlerëson që marrë parasysh natyrën e dispozitave të ligjit të kontestuar të shpallura në kundërshtim me Kushtetutën dhe faktin që pjesa tjetër e ligjit të kontestuar do të ishte vështirë e zbatueshme pas shpalljes së dispozitave të lartcekura si të pavlefshme, Ligji i kontestuar, në shërbim të parimit të sigurisë juridike, duhet të shpallet i pavlefshëm në tërësinë e tij", është thënë në njoftimin e Gjykatës Kushtetuese.



Të hënën FSK-ja organizon "Ditën e Hapur"

PRISHTINË, 24 NËNTOR - Ministria e Mbrojtjes dhe Forca e Sigurisë së Kosovës, me rastin e Ditës së Forcës, të hënën, me datë 27 nëntor, duke filluar nga ora 10:00 deri në orën 13:00, organizojnë "Ditën e Hapur". Manifestimi qendror do të mbahet në kazermën "Adem Jashari" në Prishtinë, ku do të marrin

pjesë udhëheqësit më të lartë shtetërorë si dhe përfaqësuesit ushtarakë e diplomatikë të vendeve partnere me mision në vendin tonë.

Deklarimi për medie i personaliteteve të larta shtetërore, me rastin e Ditës së Forcës, do të bëhet me fillim nga ora 11:50-12:10. Në

ketë ditë festive të gjithë qytetarët janë të mirëpritur në të gjitha kazermat e FSK-së, si në: Prishtinë, Mitrovicë, Istog, Gjilan, Prizren, Ferizaj dhe Pomozatin, ku do të ekspozohen pajisje, armatime, demonstrime si dhe aktivitete të ndryshme, që dëshmojnë kapacitetet e FSK-së.



Unioni i Bizneseve Shqiptaro-Gjermane hap zyrë në Kosovë

PRISHTINË, 24 NËNTOR - Unioni i Bizneseve Shqiptaro-Gjermane ka hapur zyrë në Kosovë. Në ceremoninë e hapjes së kësaj zyre kanë marrë pjesë kryetari i këtij unioni, Nazmi Viqa, filantropi Lazim Destani, përfaqësues të partive politike dhe kryetarë komunash. Ish-kryeministri Ramush Haradinaj ka thënë se hapja e kësaj zyre është moment jetik për Kosovën. Sipas tij, kjo zyrë do të ketë ndikim në hapjen e vendeve të reja të punës. “Shumë të rinj e të reja

shqiptarë, që dikur u detyruan ta lëshojnë atdheun për shkak të kohëve të vështira, iu përveshën punës e u bënë të zotë. Sot në Gjermani janë dhjetëra biznese të suksesshme. Ato kanë arritur që në bashkëveprim ta rritin potencialin e tyre në tregun gjerman e më gjerë, por edhe ta ndihmojnë ekonominë e Kosovës përmes projekteve të ndryshme. Sot, së bashku me kolegët Ardian Gjini dhe Ukë Blakaj, u pritëm nga Kryesia e Unionit të Bizneseve Shqiptaro-Gjermane, kryesuar

nga kryetari Nazmi Viqa dhe, po ashtu, nga kryetari i Nderit i këtij unioni, Lazim Destani. Hapja e zyrës së Unionit të Bizneseve Shqiptaro-Gjermane në Kosovë është një moment krenarie. Një mundësi e mirë për zgjerimin e veprimtarisë së tyre në favor të zhvillimit dhe shtrirjes së bizneseve të diasporës në vendlindje dhe bashkëpunimit ekonomik me kompanitë e Kosovës, një moment jetik për hapjen e vendeve të punës dhe qëndrimin e të rinjve në Kosovë”, ka thënë Haradinaj.

HAPJA E ZYRËS NË KOSOVË



Kurti: Ekonomisë së vendit secilin vit i shtohen mbi 1 miliard euro nga ndërmarrësit

PRISHTINË, 24 NËNTOR - Kryeministri i Kosovës, Albin Kurti, ka deklaruar se bashkëpunimi në mes të sektorëve është i nevojshëm në mënyrë që të zhvillohet ekonomia e vendit. Për këtë ai tha se do ta kenë çdoherë mbështetjen e qeverisë. Kurti në konferencën për dialogun publiko-privat që po mbahet me mbështetjen e Qeverisë zvicerane dhe Bankës Evropiane për Rindërtim dhe Zhvillim ka theksuar se ekonomisë së vendit secilin vit i është shtuar mbi 1 miliard euro, për çka tha se kjo rritje padyshim është rezultat i ndërmarrësisë së sektorit privat. “Konkurrencën dhe

bashkëpunimin duam t'i shohim bashkë. I gjithë sektori privat e ka të garantuar aleatin dhe partnerin në mënyrë që ta ndihmojmë njëri-tjetrin në këtë drejtim, të prodhojmë e të eksportojmë më shumë, ta luftojmë informalitetin më shumë dhe ta përforcojmë konkurrencën e vendit tonë. Ne duhet të jemi në këtë dialog edhe mirë të strukturuar në mënyrë që sfidat të definojnë saktë, takimet tona mos të jenë biseda që përsëriten, për raportime për rezultatet e arritura. Ekonomisë së vendit i është shtuar mbi 1 miliard secilin vit”, ka thënë Kurti.



Shahini: Në vitin 2024 pritet që rreth 150 mijë qytetarë ta braktisin Kosovën



PRISHTINË, 24 NËNTOR - Kryetari i Aleancës Kosovare të Bizneseve (AKB) Agim Shahini, ka thënë se në bazë të një hulumtimi nga Instituti “Riinvest”, pritet që në vitin 2024, 150 mijë qytetarë të largohen nga Kosova. “Studimi i këtij institucioni i ka vërtetuar të dhënat tona paralajmëruese të studimit. Kjo mesatarisht mund të jetë e përafërt e saktë, sepse nëse janë 360 deri në 380 mijë punëtorë, të cilët aktualisht janë kontributdhënës dhe fuqia punëtore po ashtu në Kosovë mund të jetë rreth 850 mijë punëtorë, pjesa tjetër janë të papunë. Kjo del se ajo shifra rreth 150 mijë qytetarë të vendit

seriozisht do ta rrezikojë Kosovën dhe kjo është një zbrazje. Ata, për fat të keq, nuk janë vetëm punëtorë të papunë, por një numër i tyre janë punëtorë që janë në punë dhe kanë kontrata të punës”, ka deklaruar Shahini. Ai ka theksuar se, sipas një analize të AKB-së, rreth 50 mijë punëtorë mund t'i kenë marrë këtë vit kontratat e punës për në vendet e tjera. “Do të thotë, nëse brenda tri viteve kanë ikur 150 mijë me dokumente të rregullta pune, në vitin 2024 do të shkojnë plus edhe 150 mijë të tjerë si turistë. Gjermania nga dhjetori ka liberalizuar tregun ku çdo qytetar i

Balkanit Perëndimor, i cili shkon në Gjermani si turist, nëse bie në kontakt me një punëdhënës, ai mund të lidhë kontratë për një kohë shumë të shkurtër”, ka thënë Shahini në RTV21. Ai ka shtuar se në bazë të hulumtimit, përveç faktorit ekonomik, në ikjen e qytetarëve nga Kosova po ndikojnë edhe rrethanat politike. Duke përmendur sulmin terrorist në Banjskë, sanksionet nga BE-ja, rënien e investimeve të huaja, Shahini thotë se këto kanë ndikuar që qytetarët e vendit të mendojnë se Kosova është në një gjendje të vështirë.

Kosova dhe Shqipëria diskutojnë për rritjen e shkëmbimeve tregtare të produkteve bujqësore

PRISHTINË, 24 NËNTOR - Ministri i Bujqësisë, Pylltarisë dhe Zhvillimit Rural të Kosovës, Faton Peci, është takuar të premten me ministren e Bujqësisë dhe Zhvillimit Rural, Anila Denaj. Gjatë takimit të mbajtur në Tiranë, palët theksuan bashkëpunimin mes dy vendeve në fushën e bujqësisë, rritjen e shkëmbimeve tregtare, sidomos produktet bujqësore

dhe blegtorale. “Diskutimet i përqendruam në shkëmbimin e përvojave, teknologjive moderne dhe strategjive, për ta përmirësuar prodhimin bujqësor në të dy vendet dhe sigurinë ushqimore të produkteve, duke synuar të krijojmë një bashkëpunim të qëndrueshëm dhe në avantazh për të dy vendet në fushën e bujqësisë”, u shpreh ministrja Denaj.

Gjatë këtij takimi u vendosën disa piketa bashkëpunimi konkrete në aspekte bilaterale të grupeve teknike të punës në mënyrë që të arrihet kursimi i kohës dhe kostove. Për më tepër u theksua vijimi i bashkëpunimit dypalësh në fushën e agroturizmit, ku paketat e përbashkëta turistike do të jenë jo vetëm për shqiptarët në Kosovë, por edhe për turistët e huaj.



Reagim i KMDLNj-së

Në mungesë të transparencës dhe llogaridhënies besueshmëria në Gjykatën Speciale është në pikëpyetje!




Gjykata Speciale me seli në Hagë ishte themeluar nga Kuvendi i Kosovës nën një presion të jashtëzakonshëm të ndërkombëtarëve dhe me vullnetin e një pjese të subjekteve politike kosovare. Me një aneks marrëveshje ku opinioni ishte përjashtuar nga çdo informatë, po kjo gjykatë, tash absolutisht raciste nga aspekti i të drejtave të njeriut i zhveshi, fillimisht themeluesin (Kuvendin e Kosovës) por edhe institucionet tjera të Kosovës nga çdo e drejtë që të kërkojnë transparencë dhe llogaridhënie nga gjykata, ndonëse kjo karikaturë juridike deklarohet si pjesë e sistemit të drejtësisë së Kosovës dhe se punon sipas ligjeve të Kosovës. Ky absurditet, arrogancë dhe shpërfillje ndaj Kuvendit të Kosovës ka krijuar dhe krijon të gjitha kushtet për një proces gjyqësor të pabarabartë, paragjykes, të padrejtë ku epilogu thuaja është i ditur, edhe pa përfunduar procesi gjyqësor. Kur të merret parasysh fakti se institucionet aktuale të Kosovës nuk tregojnë asnjë interesim apo vullnet për t'u interesuar nëse pengjeve të Hagës po iu shkelen të drejtat elementare të njeriut (raste të tilla ka shumë), atëherë puna e kësaj gjykate thjeshtëzohet në një proces teknik; ekzekutim të një vendimi politik të qendrave të vendosjes botërore. Deputetët e Kuvendit të Kosovës kanë mungesë të guximit minimal që të kërkojnë transparencë dhe llogaridhënie për faktin se të arrestuarit, të akuzuarit dhe të dënuarit janë 100 për qind shtetas të Kosovës dhe 100 për qind janë shqiptarë. Për një çështje që paraqet interes për vendim ka dallime në baza partiake, si gjatë vizitave që iu bëhen pengjeve të Hagës ashtu edhe gjatë prononcimeve. Edhe përfaqësuesit e institucioneve kanë bërë të njëjtat dallime gjatë vizitave ndërsa kanë qenë në një linjë vetëm kur kanë marrë mëditje dhe shpenzime tjera

për vizita ndonëse, në të njëjtën kohë kanë marrë rroga të plota. Për më keq, në vend se ta përmbushin detyrimin ligjor që e kanë, angazhohen që t'ua vështirësojnë jetën pengjeve të Hagës. Zyra e Prokurorit të Specializuar për sajese të provave në Hagë, pas përgjimeve të presidentit Thaçi, kryetarit të Kuvendit të Kosovës, Kadri Veseli dhe kryetarit të GP të LV-së, Rexhep Selimi gjatë vizitave familjare dhe me të tjerë si dhe përgjimit të komunikimit elektronik bëri publik një transkript të përgjimit i redaktuar deri në shpërfytyrim (sikur edhe gjatë proceseve gjyqësore) për të kërkuar nga Gjykata Speciale Raciste që të burgosurve t'u ndalohen vizitat dhe komunikimi sikur që edhe ata të vendosen në dhoma të ndara, pa të drejtë dhe mundësi ta takojnë njëri-tjetrin. Me fjalorë të burgjeve i bien se ata do të veçohen në vetmi, deri në një vendim tjetër. Në bazë të Rregullores së GJSR, përkatësisht pikës 4. vizitat dhe komunikimi me familje nuk mund të ndalohen përveç në rast të ndonjë epidemie (siç ishte rasti i pandemisë Covid) ku rrezikohet shëndeti i përgjithshëm apo rrezikohet siguria e përgjithshme. Përveç vizitave familjare, as vizitat e avokatëve nuk mund të ndalohen ndërkaj të gjitha masat tjera mund të ndërmerren nëse ka shkelje të Rregullores dhe Rregullave të Burgut nga të privuarit nga liria. Mund të ndalohet eventualisht vizita e anëtarit të caktuar të familjes (por jo edhe familjes), ndonjë mbrojtësi (por jo edhe të ekipit mbrojtës) nëse shkelin rregullat që e përcakton Rregullorja. Familjarët, vizitorët tjerë parajmërohen se vizitat përgjohen dhe se ato përgjime mund të përdoren për ndjekje penale nëse vlerësohet se për këtë janë plotësuar kushtet ligjore. KMDLNj ende nuk ka informata të konfirmuara për masat shtrënguese ndaj Hashim Thaçit, Kadri Veselit

dhe Rexhep Selimit por se ka informata se vizitat familjare nuk iu janë ndaluar dhe as kufizuar. GJSR në Hagë, që nga fillimi ka pasur standarde të dyfishta, si për dëshmitarët, ashtu edhe për të burgosurit, të gjithë shqiptarë, të gjithë shtetas të Kosovës. Dëshmitë dhe dëshmitarët janë siguruar nga Serbia sikur edhe "provat" për gjykim, jo rrallë edhe nga radhët e BIA-së, policisë serbe, prokurorisë dhe gjykatave serbe. Janë marrë si dëshmitarë të besueshëm shqiptarë të trajnuar në Serbi e që janë kthyer në Kosovë, "analistë" dhe "veprimtarë të shoqërisë civile", sidomos gjatë vazhdimit të masës së paraburgimit. Janë marrë citate nga mediet, intervistat, prononcimet, librat, bisedat private etj. për ta rritur shkallën e inkriminimit ndaj pengjeve të Hagës. Janë marrë si të besueshme edhe raportet e organizatave ndërkombëtare (me emër të madh si HRW) ndonëse dëshmitari ka deklaruar se ato raporte janë shkruar nga vetëm një burim, mediet dhe shërbimet serbe dhe të cilat nuk janë verifikuar në terren apo nga një burim tjetër plotësues. Pengjet e Hagës një kohë ishin të izoluar, nuk lejohej komunikimi midis tyre. Salih Mustafës për shkak se nuk iu ofrua shërbimi shëndetësor me kohë dhe i duhur, iu përkeqësua gjendja shëndetësore shumë. Hysni Gucati, i liruar me kusht nuk iu ofrua ndihma mjekësore (operimi për shkak të pasojave të luftës) deri në kohën kur u dënua me dënim kapital. Nasim Haradinajt iu mohua pjesëmarrja në varrimin e vëllait që është non sense për gjykata të ngjashme. Tribunali i Hagës, jo që i lironte për raste të tilla por ua siguronte edhe pjesëmarrjen gjatë kohës së të pamës. Vizitat të ashtuquajtura humanitare mund të quhen me çdo emër tjetër përveç humanitare.

Askush nuk është hetuar për rrjedhje, shitje apo kontrabandim të informatave nga Zyrat e Prokurorit të Specializuar për sajese të provave përveç se janë dënuar me dënime drakonike, Hysni Gucati dhe Nasim Haradinaj. Aakujt nga Kosova nuk i lejohet ta monitorojë për së afërmi punën e kësaj GJSR, t'i vizitojë të burgosurit dhe të shohë kushtet fizike ku mbahen dhe trajtimin e tyre, të bisedojë me stafin mbajtës dhe menaxhues, të vizitojë shëtitoren, kuzhinën, qendrën mjekësore, bibliotekën dhe objektet tjera që paraqesin interes nga aspekti i të drejtave të njeriut të personave të privuar nga liria. Përralla janë se aty zbatohen standardet më të larta të drejtave të njeriut si Rregullat Evropiane të Burgjeve dhe, paradoksisht edhe Rregullave të Nelson Mandelës (standarde më të larta të të drejtave të burgosurve sipas kritereve të Kombeve të Bashkuara) nëse ato nuk iu nënshtrohen një monitorimi të pavarur e që kjo Gjykatë nuk e ka lejuar. Çdo masë shtrënguese brenda një burgu paraqet një dramë më vete për të burgosurit e që reflektohet në përkeqësimin e statusit social dhe shëndetit mendor. Pavarësisht se vizitat familjare nuk janë penguar apo kufizuar (nuk e lejon Rregullorja përveç në raste të caktuara), këto masa shtrënguese do të reflektojnë gjatë çdo vizite familjare sepse konsiderohen se ato mbahen nën trysni dhe kërcënim, si për familjarët ashtu edhe për të burgosurit. Këto masa shtrënguese do të ndikojnë edhe në përgatitjen e mbrojtjes cilësore të Hashim Thaçit, Kadri Veselit dhe Rexhep Selimit. Masat shtrënguese do të ndikojnë edhe te dëshmitarët e ardhshëm që nuk do ta kenë një ambient të lirë dhe të sigurt për të dëshmuar, sidomos për dëshmitarët që nuk duan ta përfillin skenarin e Prokurorit të Specializuar për sajim

të provave. Këto masa shtrënguese ndikojnë edhe në opinionin e gjerë në Kosovë duke thelluar ndarjet, edhe ashtu të theksuara. KMDLNj pret që transkriptet e nxjerrë nga përgjimet (që parashihen edhe me Rregulloren) të jenë më sqaruese në të kundërtën kjo mund të konsiderohet si përpjekje e GJSR që të arsyetojë mbajtjen aq të gjatë në paraburgim të pengjeve të Hagës, arrestimet e fundit dhe inkursionin përmes bastisjeve si në kohën e Xhengz Kanit që po e bëjnë hetuesit anekënd Kosovës duke konfiskuar celulari, PC, libra, publikime dhe materiale tjera, pa i dhënë llogari asnjë institucioni në Kosovë. Përfaqësuesit institucionalë nuk kanë asnjë interesim për fatin e të burgosurve në Hagë me arsyetim se nuk duan të ndërhyjnë në drejtësi (kjo është në rregull) mirëpo mandati kushtetues i detyron që të interesohen për respektimin e të drejtave të njeriut, si të privuar nga liria e që ua garantojnë të gjitha dokumentet kombëtare dhe ndërkombëtare për të drejtat e njeriut. Deputetët e Kuvendit të Kosovës nuk mund ta zhbëjnë këtë gjykatë (disa nuk kanë guxim, të tjerët janë haptas në anën e Gjykatës) mirëpo e kanë detyrim ligjor, njerëzor dhe moral që, si themelues të kësaj gjykate të marrin vendim nëse kjo Gjykatë është apo nuk është e Kosovës. Nëse mendojnë se është, atëherë duhet të kërkojnë përgjegjësi dhe llogaridhënie në të kundërtën duhet të dalin botërisht dhe të deklarohen se kjo gjykatë nuk ka të bëjë asgjë me Kosovën dhe ta shpallin se nuk është e Kosovës. Atëherë, kjo gjykatë do ta merrte statusin që e meriton dhe që realisht e ka, Gjykatë Speciale Raciste dhe Kolonialiste që edhe viktimat sikur edhe ata që i konsideron përgjegjës i trajton, jo në bazë të provave por sipas përkatësisë etnike!



Veton ZYMBERI, redaktor i sportit

50 shtete pjesëmarrëse në Evropianin e Xhudos në Prishtinë

PRISHTINË, 24 NËNTOR - Kampionati i Hapur Evropian i Xhudos vjen si ngjarja më e madhe sportive në vend. Kjo ngjarje do të zhvillohet në Pallatin e Rinisë dhe Sporteve në Prishtinë më

16 dhjetor. Deri në 50 shtete pjesëmarrëse me mbi 100 xhudistë/e elitarë/e do të garojnë për çmimin e madh prej 300 000 eurosh në total në të gjitha kategoritë. Kampionati i Hapur

Evropian i Xhudos, "European Championships Open", organizohet në kuadër të programit shtetëror, "Kosova, shtet i xhudos" nga Federata e Xhudos e Kosovës dhe

mbështetet nga Ministria e Kulturës, Rinisë dhe Sportit dhe Federata Evropiane e Xhudos. Federata e Xhudos e Kosovës bëri me dije se hyrja do të jetë falas për të gjithë.



Balkani, i pagueshëm në Superligë

EPOKA E RE Veton ZYMBERI

Prishtinë, 24 nëntor - Ballkani i Suharekës nuk po paraqitet mirë vetëm në arenën ndërkombëtare, konkretisht në Ligën e Konferencës, por edhe në Superligën e Kosovës. Skuadra e drejtuar nga Ilir Daja e ka mposhtur Malishevën me rezultat 0-2 në kuadër të javës së 15 në elitë. Në këtë mënyrë kampionët në fuqi e kanë përforcuar edhe më shumë kreun dhe kanë regjistruar fitoren e pestë radhazi.

"Mungesa e Dellovës, Zybës dhe Kuçit, që kishin ndeshje me Përfaqësuesen e Kosovës dhe Malit të Zi, u vërejt. Në pjesën e dytë ishim më të mirë, më të qetë, pas shënimit të golave në pjesën e parë. Malisheva ka ekip simpatik me lojtarë të rinj dhe perspektivë. Pas rikonstruktimit të këtij stadiumi, është këndshëm të



luash futboll në këtë fushë. Mua më vjen mirë sepse vazhdojmë me fitore edhe pse kundërshtari na vuri në vështirësi. Ne kemi lojtarë me goxha cilësi individuale. Në momentin që dalin në raste të pastra duhet të jenë më cinikë, më të saktë para portës. Duhet

t'i shfrytëzojmë rastet që na vijnë", ka thënë pas ndeshjes, Ilir Daja, trajner i Ballkanit. Vendësit e Malishevës janë mbajtur vetëm deri në minutën e 30, kur Nazmi Gripshi e kaloi skuadrën mysafire në epërsi 0-1. Tre minuta para përfundimit të pjesës së parë, Albin Berisha

realizoi golin e dytë dhe të fundit në ndeshje. Në pjesën e dytë gola të tjerë nuk pati dhe Ballkani mori tri pikët e plota. Trajneri i Malishevës, Qëndrim Kida, pas ndeshjes deklaroi: "Kishim një ekip të fortë që në të gjitha elementet e lojës është i rrezikshëm. Në ndërprerje, sulm pozicional, kundërsulme. Ne u përgatitëm për t'i rezistuar, por morëm dy gola të lehtë. Pjesa e dytë ishte e vështirë sepse kemi mundur të pranohim edhe më shumë gola. Në këtë ndeshje nuk kemi mundur të bënim më tepër. Ballkanin e kemi respektuar më shumë sesa që duhet. Ekipi duhet të jetë më agresiv për ta mposhtur një Ballkan të tillë. U desh të ishim më të vëmendshëm në momentet kur i pranuan golat. Kemi kualitet mjaftueshëm për të mos pranuar gola të tillë". Pas tri pikëve të reja, Ballkani përforcon opozitën e parë me

35 pikë, derisa Malisheva mbetet në kuotën e 20 pikëve. Sot (e shtunë) zhvillohen dy ndeshjet e tjera për këtë xhiro në Superligë dhe takohen Fushë-Kosova me Dukagjinin si dhe Feronikeli 74 me Lirinë. Të dielën zhvillohen edhe dy ndeshja të tjera. Derbi i kësaj xhiroje zhvillohet në Hajvali në mes të Prishtinës dhe Dritës, kurse Gjilani e pret skuadrën e Llapit.

SUPERLIGA

Malisheva-Ballkani 0-2

Të shtunën takohen:
13:00 Fushë Kosova-Dukagjini
13:00 Feronikeli 74-Liria

Të dielën takohen:
13:00 Gjilani - Llapi
13:00 Prishtina - Drita

Trepça - Peja, derbi i fundjavës në basketboll

MITROVICË, 24 NËNTOR - Fundjava sjell super derbi nga elita e basketbollit. Padyshim që sfida kryesore e kësaj xhiroje është Trepça - Peja. Pasi nuk arritën ta kalojnë fazën e grupeve të FIBA Europe Cup, të dyja skuadrat janë përqendruar në garat vendore, ku kanë ambicie të mëdha në këtë edicion. Mitrovicasit renditen në vendin e dytë me gjashtë fitore dhe dy humbje, kurse pejanët në vendin e parë me shtatë fitore dhe një humbje, duke e bërë sfidën edhe më interesante të shtunën. Këto dy skuadra u përballen edicionin e kaluar në finale të "play-off"-it, ku triumfuan verdhezinjtë, që u

shpallën kampionë, ndërsa "xehtarët" triumfuan në Superkupën e Kosovës, duke mundur pikërisht pejanët. Takimi tjetër i së shtunës është në mes të Bashkimit dhe Istogut. Prizrenasit kanë tri fitore dhe gjashtë humbje, kurse istogasit një fitore e tetë humbje. Pikërisht fitoren e vetme "Djemtë e Bjeshkës" e kanë ndaj prizrenasve. Dueli i parë i së dielës është në mes të Proton Cable Prizrenit dhe Vëllaznimit. Prizrenasit numërojnë dy fitore e gjashtë humbje, kurse kuqezinjët janë në një formë të lartë, ku kanë pesë fitore radhazi pas katër humbjeve radhazi. Xhironja

e dhjetë mbyllet me një tjetër derbi ndërmjet Golden Eagle Yllit dhe Sigal Prishtinës. Therandasit kanë pesë fitore dhe katër humbje, ndërsa prishtinasit pesë fitore e tri humbje.

SUPERLIGA - Java 10

Të shtunën takohen:
17:00 Trepça - Peja
19:00 Bashkimi - Istogu

Të dielën takohen:
17:00 Proton C. Prizreni - Vëllaznimi
19:00 G. Eagle Ylli - Sigal Prishtina



Skandali i Gjakoviqit, Federata e Tenisit e Kosovës do të bëjë ankesë në ITF

Prishtinë, 24 nëntor - Federata e Tenisit e Kosovës e ka dënuar fuqishëm provokimin e radhës nga tenisti serb Novak Gjakoviq, pasi në paraqitjen e ekipit të Serbisë në kuadër të Kampionatit Botëror të Tenisit

u lëshuan këngë nacionaliste serbe kundër Kosovës. "Është për keqardhje që provokime të tilla me këngë e veprime nacionaliste po ndodhin nëpër ngjarje të mëdha sportive, sidomos në Davis

Cup, që është edhe Kampionati Botëror i Tenisit. ITF - Federata Ndërkombëtare e Tenisit, si organizatore e kësaj gare, është përgjegjëse dhe bashkëfajtoare për këtë provokim të radhës ndaj

shtetit të Kosovës", thuhet në reagim. Federata e Tenisit paralajmëroi se do të bëjë ankesë në Federatën Ndërkombëtare, Komitetin Olimpik Ndërkombëtar dhe institucione të tjera relevante.



Verstappeni: Kurrë në një skuadër me Hamiltonin

ABU DHABI, 24 NËNTOR - Botërori 2023 i Formulës 1 do të mbyllet këtë fundjavë në Abu Dhabi. Një pistë që sjell ndër mend mjaft kujtime, si ajo e dy viteve më parë, kur Max Verstappeni shpallej për herë të parë kampion bote për pilotë. Në xhiron e fundit ai parakalonte Lewis

Hamiltonin, në një garë me shumë polemika për atë vendim që morën komisarët e pistës në lidhje me makinën e sigurisë. Ajo garë bëri që marrëdhënia mes dy pilotëve të jetë jo fort e mirë edhe pse në pistë e jashtë saj respektohen. Duke folur për marrëdhënien me Hamiltonin

dhe mundësinë që një ditë të dy pilotët të pilotojnë të njëjtën makinë, Verstappeni ka deklaruar: "Kjo gjë s'ka për të ndodhur kurrë. Ndaj, herë tjetër mos më pyetni për këtë gjë". "Nuk dua që njerëzit të më thonë për Hamiltonin si shok skuadre, pasi në Formula 1 ka mjaft pilotë

të tjerë, që janë miqtë e mi, që e meritojnë një shans të pilotojnë një makinë si Red Bull. Hamiltoni është 41 vjeç, ndaj është pak vonë për të krijuar një 'dream team' së bashku", u shpreh Verstappeni, që të dielën synon të bëhet piloti i tretë në historinë e këtij sporti me më shumë fitore.



Sylvinho për 'Eurosport': Shpirti dhe zemra janë sekretet e Shqipërisë

TIRANË, 24 NËNTOR - Shqipëria siguroi për herë të dytë një biletë për në Evropian, këtë herë me Sylvinhon në stol. Strategu brazilian po përjeton një moment magjik në krye të kuqezinjve. Ai është kthyer në kryefjalën e medieve më prestigjioze. Sylvinho kthehet pas në kohë duke pranuar se në momentin e parë as që e imagjinonte një përfundim të tillë. "Është një ëndërr për mua. Nëse dikush do të më thoshte një apo dy vjet më parë: A do të shkosh te Shqipëria? Do t'i thosha pse? Nuk e di. Pra, ajo që dua të them është se: kur je një trajner, ose dhe lojtar, çdo gjë është shumë e shpejtë. Pëlqej ta përjetoj atë moment. Synimi ynë, ëndrra jonë, është ta përgatitim ekipin për 6-7 muajt e ardhshëm", ka thënë Sylvinho. "Unë besoj shumë te marrëdhënia me lojtarët. E kam thënë edhe më herët, është ndryshe kur në mes futet një përkthyes, është ndryshe kur flet me zemër, kur i sheh në sy lojtarët. Është shumë e



rëndësishme të flasësh me lojtarë të caktuar, por më e rëndësishmja është zemra dhe shpirti që ke në skuadër. Pa këto nuk mund të luash. Mund të jesh një lojtar i madh, mund të jesh një lojtar

ndryshe, por nëse nuk ke frymën, shpirtin e grupit, nuk mund ta arrish objektivin tënd. Futblli nuk është një lojë individuale. Është një lojë ekipore", ka shtuar Sylvinho.

'Karagaçi', arenë e derbit të fundjavës

PEJË, 24 NËNTOR - E gjithë vëmendja në fundjavë do të jetë në palestrën "Karagaçi" në Pejë. Të dielën nga ora 18:00 zhvillohet derbi i madh i Superligës së hendbollistëve në mes të Besa Famgasit dhe Rahovecit. Ndashja i takon xhiros së 11-të të kampionatit të Kosovës. Javë më parë Rahoveci e mposhti Besën për një gol, duke ia shkaktuar humbjen e parë kampionale pas një kohe shumë të gjatë. Rahoveci është lider me 20 pikë, pasi i ka fituar 10 ndeshjet e deritashme. Ndërkohë Besa është e dyta në tabelë, ndërsa ka vetëm atë humbje nga Rahoveci. Të dyja skuadrat kanë shënuar fitore të thella të enjten dhe janë plotësisht gati për spektakël hendboll. Rrjedha e ndeshjes së parë garanton lojë të fortë dhe shumë interesante deri në fund. Nën hijen e derbit në Pejë, në fundjavë janë edhe tri ndeshjet e tjera të xhiros së 11-të. Po të dielën prej



orës 18:00, Vushtrria takohet me Kastriotin. Të shtunën janë ndeshjet Vëllaznimi - Trepça (19:30) dhe Deçani - Prishtina (19:00). Në Ligën e Parë (meshkujt) është java e tetë. Të shtunën janë

tri ndeshje: Vjosa - Lepenci (18:30), Drita - Prizreni (18:30), Llapi - Ulpiana (19:00). Të dielën janë dy takime. Dukagjini e Istogu luajnë prej orës 13:00, ndërsa Drenica e Samadrexha prej orës 18:00.

SHKURT

Përfundon sezoni për Betim Fazlijin

Betim Fazliji ka pësuar lëndim të rëndë. Ai nuk do mund të kthehet në fushë për këtë sezon. Repreruesi i Përfaqësueses së Kosovës ka këputur ligamentin e kryqëzuar në gjurin e majtë gjatë stërvitjes. 24-vjeçari do t'i nënshtrohet një intervenimi kirurgjik këtë fundjavë. Lajmin e ka dhënë faqja zyrtare e klubit të tij, St. Gallen. "Betim Fazliji ka këputur ligamentin e kryqëzuar në gjurin e majtë gjatë stërvitjes të së enjtes pasdite. 24-vjeçari do t'i nënshtrohet një operacioni këtë fundjavë dhe do të mungojë për pjesën tjetër të sezonit 2023/24. E gjithë familja e FCSG ju uron, i dashur Betim, operacion të suksesshëm dhe shërim të shpejtë", thuhet në njoftimin e St. Gallen.

Asani: E dua në grup Gjermaninë

Shqipëria nga 14 qershori do të përfaqësohet në fazën finale të Evropianit, një destinacion i ëndërruar edhe për qindra mijëra tifozë shqiptarë. Një nga lojtarët më meritore që Shqipëria ka arritur në këtë fazë është futbollisti Jasir Asani. Në një intervistë të dhënë për "Top-Channel", ai ka thënë se në fazën e grupeve do të dëshironte që për kundërshtar ta kishte edhe Gjermaninë, vend mikpritës i "Euro 2024". "Gjermaninë do ta doja. Unë e kam thënë që me këtë grup që kemi besoj se na bie një grup i fortë që t'i tregojmë botës se kush jemi, t'i tregojmë botës që kjo Kombëtare ishte surpriza", ka thënë Asani. Shorti për fazën e grupeve të Kampionatit Evropian do të hidhet më 2 dhjetor.

Tuchel: E duam Mullerin në skuadër edhe sezonin tjetër

Trajneri i Bayern Munchenit, Thomas Tuchel, është i bindur se veterani Thomas Muller nuk duhet të tërhiqet nga futblli. Tekniku i gjigantëve të Gjermanisë theksoi së fundmi se 34-vjeçari mund të vijojë të luajë në nivele maksimale ndaj është i mirëpritur për të qëndruar në Bayern edhe për sezonin e ardhshëm. "Ne e duam Mullerin në skuadër. Është e qartë edhe nga ana e vet lojtarit ai kërkon të luajë ende futboll. Pastaj nuk e kuptoj se cila është arsyeja që ai të mos vazhdojë në këto nivele të larta që është paraqitur aktualisht? Jam i bindur se mund ta bëjë këtë edhe për sezonin tjetër. Unë e shoh atë të stërvitet dhe të ndihet shumë mirë. Mulleri është një ikonë e këtij klubi dhe ka respektin tonë maksimal", ka thënë Tuchel.

Spalletti: E merituar kualifikimin në 'Euro 2024'

Përzgjedhësi i Italisë, Luciano Spalletti, iu kundërpërgjigj kritikeve se skuadra e tij ia "vodhi" Ukrainës kualifikimin në "Euro 2024". Tensionet u ndezën në "BayArena" të hënën pasi Bryan Cristante i Romës u përplas me Mykhailo Mudryk e Chelsea në zonën e penalltisë në minutat e fundit të ndeshjes. "Ne nuk kemi vjedhur asgjë. Vërtet e kemi merituar kualifikimin në Kampionatin Evropian. Nëse dikush merret me atë incident kundër nesh, nuk është e drejtë, pa e shikuar pjesën tjetër të paraqitjes së ekipit. Ndashja ishte e vështirë për shkak të presionit që kishte, dhe ai incident mund të jetë i dyshimtë, por sigurisht jo aq i qartë sa shumë njerëz duan të thonë. Zhgënjyese", ka thënë Spalletti.

Mourinho: Një ditë do të shkoj të drejtoj në Arabinë Saudite

Trajneri Jose Mourinho është në sezonin e tij të fundit me Romën, ndërkohë që për të ardhmen e tij situata është ende e paqartë. Portugezi ka pranuar se nuk ka nisur ende bisedimet me klubin për rinovimin e

kontratës, ndaj gjithçka mund të ndodhë korrikun e ardhshëm. Në një deklaratë për medie, "Special One" ka pranuar se një ditë do të drejtojë Arabinë Saudite. Nga Liga Arabe kanë ardhur vitin e fundit disa oferta

për Jose Mourinhon, madje edhe për ta drejtuar ekipin kombëtar të këtij vendi, por portugezi ka refuzuar gjithnjë, duke deklaruar se do ta respektojë kontratën aktuale. "Mendoj se një ditë do të shkoj të

drejtoj në Arabinë Saudite. Gjithsesi, kur them se do të shkoj aty një ditë nuk bëhet fjalë për nesër apo pasnesër", u shpreh Jose Mourinho, që më pas ka folur edhe për mundësinë e transferimit te Real Madridi.

"Unë te Reali? Ata e kanë një trajner të jashtëzakonshëm, pse duhet të marrin një tjetër. Unë jam një fans i Real Madridit dhe i Carlo Ancelottit. Unë shpresoj që ai të jetë aty edhe vitin tjetër", u shpreh Mourinho.



Republika e Kosovës
Republika Kosova - Kosova Cumhuriyeti



Komuna e Prizrenit
Opština Prizren – Prizren Belediyesi

DREJTORIA KOMUNALE E ARSIMIT NË PRIZREN

Nr. 2253/23

Datë: 24.11.2023

Në bazë të nenit 8 të Ligjit të Punës në Republikën e Kosovës Nr. 03/L-212, Ligjit nr. 03/L-068 për Arsimin në Komunat e Republikës së Kosovës, Udhëzimit Administrativ nr. 07/2017 për rregullimin e procedurave për themelimin e marrëdhënies së punës në sektorin publik, Nenit 8 paragrafi 6 të Udhëzimit Administrativ MASHT Nr. 05/2021 për normativin mbi kuadrin profesional të arsimit të përgjithshëm, Komuna e Prizrenit, shpall:

**KONKURS
PËR PLOTËSIMIN E VENDEVE TË LIRA TË PUNËS**

Titulli i vendit të punës: Asistent për fëmijë/nxënësit me nevoja të veçanta.

Departamenti/Drejtoria: Drejtoria e Arsimit në Prizren

Institucioni: Komuna e Prizrenit

Numri i Pozitave: 20

Titulli i mbikëqyrësit: Drejtori i Shkollës

Kohëzgjatja e emërimit: Me kohë të pa caktuar

Koeficienti/Grada: E22-5

Në shkollat:

SHFMU "Emin Duraku" në Prizren – 2 pozita

SHFMU "Fatmir Berisha" në Prizren

SHF "Lekë Dukagjini" në Prizren

SHFMU "Motrat Qiriazi" në Prizren – 2 pozita

SHFMU "Fadil Hisari" në Prizren

SHFMU "Mati Logoreci" në Prizren

SHFMU "Mustafa Baku" në Prizren

SHF "Abdyl Frashëri" në Prizren

SHFMU "Ibrahim Fehmiu" në Prizren

SHFMU "Haziz Tola" në Prizren

SHFMU "Xhevat Berisha" në Prizren

SHMU "Gani Saramati" në Prizren

SHFMU "Hysen Rexhepi" në Prizren

SHFMU "Zenun Çoçaj" në Gjonaj

SHFMU "Dëshmorët e Zhurit" në Zhur

SHFMU "Dëshmorët e Kabashit" në Korishë

SHFMU "Ekrem Rexha" në Lubizhdë

SHFMU "Svjetlosti" në Manastericë (mësim në gjuhën Boshnjake)

Kualifikimi i kërkuar: Niveli i 5-të (post sekundar) i kualifikimit asistent, për fëmijë/nxënësit me nevoja të veçanta arsimore.

Detyrat dhe përgjegjësitë:

-Ndihmon fëmijët/nxënësit në zhvillimin dhe promovimin e pavarësisë, orientimin dhe mobilitetin, ndihmon në vendosjen në klasë dhe dorëzimi i fëmijës te personi familjar që e përcjellë atë, në oborrin e shkollës;

-Punon me mësimdhënësit dhe stafin tjetër për zbatimin e PIA-s, lëndë të individualizuara ose mësim në fusha të aktiviteteve;

-Përgatit materiale mësimore si dhe menaxhon me pajisjet e nevojshme brenda dhe jashtë klasës;

-Vëzhgon dhe dokumenton vështirësitë dhe nevojat e identifikuar të fëmijëve, përgatit informata kthyesë për vështirësitë dhe arritjet e fëmijëve;

-Promovon arsimin gjithëpërfshirës dhe pranimin e të gjithë fëmijëve në klasë, inkurajon fëmijët në komunikim për pjesëmarrje në lojë, stimulimin e të folmit të gjuhës përmes bisedës dhe lojës;

-Mbikëqyre dhe ndihmon fëmijët/nxënësit gjatë racioneve ushqimore, kujdeset për nevojat fizike dhe mjekësore të nxënësve dhe asiston në veshjen dhe pastërtinë e përgjithshme të tyre;

-Planifikon me mësues programin ditor dhe javor për mësim, aktivitete dhe ngjarje me qëllim të mbështetjes së fëmijëve për mësim;

-Promovon bashkëpunimin shkollë-shtëpi, mbështetë dhe diskuton qështje të ndjeshme me prindin/kujdestarin;

-Respekton rregullat dhe etikën e shkollës, sjelljet e mira ndaj nxënësve;

-Prezanton punën dhe arritjet e nxënësve;

-Informacionet në shkollë i trajton si plotësisht konfidenciale;

-Obligohet sipas nevojës të asistojë edhe në ndonjë shkollë tjetër ku ka nevojë.

Dokumentacioni i kërkuar:

(në kopje fizike)

- Fotokopja e Letërnjoftimit

- Niveli i 5-të (post sekundar) i kualifikimit asistent, për fëmijë/nxënësit me nevoja të veçanta arsimore (kopja e noterizuar)

- Nostifikimi, nëse kandidati e ka kryer shkollimin jashtë Kosovës

- Ekstrakti i lindjes

- Certifikata që nuk jeni nën hetime

Dokumentet që do të kërkohen për kandidatët të cilët përzgjidhen

-Vërtetimi/dëshmia se kandidati nuk ka qenë i dënuar për krim, dhunë ose vepër të padenjë që përfshinë fëmijët.

-Certifikatën shëndetësore të lëshuar nga një institucion publik shëndetësor, me të cilën dëshkohet gjendja e tij/saj shëndetësore (kandidati/ja e sjell pas përzgjedhjes sipas procedurës.

-Të gjitha dokumentet origjinale kandidati/ja i/e përzgjedhur i sjell për verifikim sipas procedurave.

-Konkursi do të jetë i hapur 15 ditë kalendarike nga data **25.11.2023 deri më 11.12.2023** që konsiderohet si dita e fundit dhe mbyllja e konkursit.

-Aplikimet e dorëzuara pas afatit të parashikuar nuk pranohen dhe aplikimet me mangësi refuzohen.

-Aplikacioni për konkurim merret në faqen e Komunës së Prizrenit. Pas plotësimit sipas çdo pike të aplikimit, bashkëngjiti dokumentet të cilat kërkohen sipas konkursit dhe mund të aplikoni në Drejtorinë Komunale të Arsimit në Prizren.

VËMENDJE: Aplikimet e pranuar pas afatit të përcaktuar konsiderohen të pranueshme, nëse data në dërgesën postare, ose çfarëdo dëshmie tjetër për datën e dërgimit, dëshmon se ajo është dërguar brenda afatit të dorëzimit të aplikimeve. Konkursi është i barabartë për të gjithë kandidatët e synuar, pa asnjë lloj diskriminimi ashtu siç parashikohet nga legjislacionin në fuqi. Konkursi dhe rezultatet shpallen në web faqen e Komunës së Prizrenit.

Rezultatet shpallen në linkun: <https://kk.rks-gov.net/prizren/category/konkurset-njoftimet/konkurset/>

Drejtorja e Arsimit në Prizren
Drejtoresha/Luljeta Veselaj Gutaj



Gjej PUNË

- Lajme nga tregu i punës
- Shërbime shkrimi

Gjej Punë ofron shërbime drejtë përgaditjes së:

- CV-së
- Letrën Motivuese
- Parapregaditje për intervistë



facebook

www.facebook.com/gjejpuneshpejte

RESTAURANT

SWISS TAVERNA

Tel: +377 45 400 156

+386 49 848 553

PRISHTINË

>> SHPALLJE TË VOGLA <<

- N.T.P. "Blera M" shpall të pavlefshme certifikatën e biznesit me nr. 810930059.

- Arlind G. Gashi B.I. Frishop Ari shpall të pavlefshme certifikatën e biznesit me nr. 812056093.

- Afrim Sahatqija nga Gjakova shpall të pavlefshme diplomën e Gjinnazit "Hajdar Dushi" Gjakovë.

- Marigona Nue nga Doli, KK Gjakovë shpall të pavlefshme dëftesën e plotë të sh.f.m.u. "Anton Qeta" Dol, KK Gjakovë nga kl. I-X dhe VI-IX.

- Dea Qerkezi nga Gjakova shpall të pavlefshme dëftesat e kl. 10. 11. 12 dhe diplomën e Gjinnazit "Hajdar Dushi" Gjakovë.

- Shaqir Jashari B.I shpall të pavlefshme arkën fiskale me numër UNIK: 811116070.

- Nysret Tunuzliu B.I, shpall të pavlefshme arkën fiskale me numër UNIK: 810002832.

- Imer Himaj nga Osek Hyla KK Gjakovë shpall të pavlefshme dëftesat e kl. X, XI, të sh.m. Teknike "Nexhmedin Nixha" Gjakovë Transport Rrugorë.

- Bedri Nezaj nga Gjakova shpall të pavlefshme dëftesat e klm I, II të Gjimanzit "Hajdar Dushi" Gjakovë.

- Fisnik Kumnova nga Gjakova shpall të pavlefshme diplomën e sh.m. Mjekësisë Gjakovë.

- Ferdane Alidemaj shpall te pavlefshme dëftesën e shkollës fillore "Fazli Greicevci".

- Ubejd Gashi shpall te pavlefshme diplomën e Fakultetit Juridik të Universitetit të Prishtinës me nr. të diplomës 4157.

- Lëshoj banesën me qira në lagjen Bregu i Diellit te Furra "Qerimi2", i ka dy dhoma të fjetjes, sallon me kuzhinë, shpajz dhe dy ballkona. Për info 044/332-640.

- Lëshoj banesën me qira në lagjen Bregu i Diellit te Furra Qerimi2, i ka dy dhoma të fjetjes, sallon me kuzhinë, shpajz dhe dy ballkona. Për info 044/332-640.

